

四庫全書

集部

欽定四庫全書

古詩紀卷四十

明 馮惟訥 撰

晉第十

夏侯湛

字孝若譙國人幼有盛才文章宏富善構新詞泰始中舉賢良拜郎中後轉尚書郎出為

野王令惠帝即位為散騎常侍元康初卒

周詩

敘曰周詩者南陔白華華黍由庚崇丘由儀六篇有其義而亡其辭湛續其亡故云周詩也

世說曰夏侯湛作周詩成

示潘安仁安仁曰此非徒溫雅乃別見孝悌之性潘因此遂作家風詩

既殷斯虔仰說洪恩夕定晨省奉朝侍昏宵中告退雞
鳴在門孳孳恭誨夙夜是敦

山路吟

夙駕兮待明陟山路兮遐征冒晨朝兮入大谷道逶迤
兮嵐氣清攬轡兮抑馬踟躕兮曠野曠野軀兮遼落崇
岳兮嵬竒丘陵兮連離卉木兮交錯淥水兮長流驚濤
兮拂石

江上泛歌

悠悠兮遠征
悠悠兮暨南荆
南荆兮臨長江
臨長江兮討不庭
江水兮浩浩
長流兮萬里
洪浪兮雲轉
陽侯兮奔起
驚翼兮垂天
鯨魚兮岳跼
蘼蕪兮被臯陸
修竹鬱兮翳崖趾
望江之南兮
遨目桂林
桂枝蒼鬱兮
鷓鴣揚音
凌波兮願濟
舟楫不具兮
江水深沉
嗟迴盼於北
夏何歸軫之難尋

離親詠

剖符兮南荆辭親兮遐征發軔兮皇京夕臻兮泉亭撫
首兮內顧按轡兮安步仰戀兮後塗俯歎兮前路既感
物以永思兮且歸身乎懷抱苟違親以從利兮匪曾閔
之攸寶視微榮之瑣瑣兮知吾志之愈小獨申愧於一
心兮慙報德之彌少

長夜謠

日暮兮初晴天灼灼兮遐清披雲兮歸山垂景兮照庭
列宿兮皎皎星稀兮月明亭檐隅以逍遙兮盼太虛以

仰觀望閭闔之昭晰兮麗紫微之暉煥

寒苦謠

惟立冬之初夜天慘慄以降寒霜皚皚以被庭冰澹瀨
於井幹草槭槭以疏葉木蕭蕭以零殘松隕葉於翠條
竹摧柯於綠竿

王讚

字正長義陽人也博學有俊才辟司空掾歷散騎侍郎卒

三月三日詩

招搖啟運寒暑代新疊疊不舍如彼行雲猗猗季月穆

穆和春皇儲降止宴及嘉賓嘉賓伊何具惟姻族如彼
葛藟衍于樛木郁郁近侍巖巖台嶽庶寮鱗次以崇天
祿如彼崑山列此琚玉巍巍天階亦降列宿右載元首
左光儲副大祚無窮天地為壽

侍皇太子宴始平王

疊疊聖盾繼明重體樂此棠棣其甘如薺我有嘉宴以
洽百禮煌煌同族藹藹王僚惟中惟外如瓊如瑤湛湛
朝雲德靡不覆玄黃所綴文成綵繡政以神和樂以安

奏一人有慶萬邦是祐

侍皇太子祖道楚淮南二王

於明聖晉仰統天緒易以明險簡以識

藝文
作知

阻研彼羣

慮俾侯授土郁郁二王祗承皇命睹離鑒親觀禮知盛
皇儲降會延于公姓瞻彼行役並憩同林分塗殊軌靡
不迴心

雜詩

朔風動秋草邊馬有歸心胡寧久分析靡靡忽至今王

事離我志殊，隔過商參昔。往鶴鷓鳴，今來蟋蟀吟。人情懷舊鄉，客鳥思故林。師涓久不奏，誰能宣我心。

孫楚

字子荆，太原中都人。少負才氣，多陵傲。初為石苞驃騎參軍，初至，長揖曰：天子命我參卿軍事。

因此構隙，湮廢積年。後扶風王駿起為征西參軍，遷衛軍司馬。惠帝初，拜馮翊太守卒。

答弘農故吏民

昔我先侯邁德垂，化康哉之詠寔由良佐。惟余忝辱弗克，負荷每歷貴邦。仰瞻泰華，追慕先軌。感想哀嗟，詵詵臣故爰及羣士。皓首老成，率彼邑里。闡崇高義，長幼以

齒

除婦服詩

集云婦胡母氏也世說曰孫子荆除婦服作詩以示王武子王曰未知文生於情情生於文覽之悽然增伉儷之重

時邁不停日月電流神爽登遐忽已一周禮制有敘告
除靈丘臨祠感痛中心若抽

征西官屬送於陟陽候作詩

晨風飄岐路零雨被秋草傾城遠追送餞我千里道三

命皆有極咄嗟安可保莫大於殤子彭聃猶為夭吉凶
如糾纏憂喜相紛繞五臣作擾天地為我鑪萬物一何小達
人垂大觀誠此苦不早乖離即長衢惆悵盈懷抱孰能
察其心鑒之以蒼昊齊契在今朝守之與偕老

太僕座上詩

以下
闕文

朝欽厥庸出尹京畿迴授太僕四牡駢駢綠耳盈箱翠
華歲蕤勳齊庭實增國之輝

祖道詩

仰天惟龍御地以驥利有攸往不期而至

之馮翊祖道詩

舉翮撫三秦抗我千里目念當隔山河執觴懷慘毒

董京

字威輦不知何郡人初與隴西計吏俱至洛陽被髮而行逍遙吟詠常宿白社中時乞於市後

數年適去莫知所之

詩二首

晉書曰京既遁去於其寢處有詩二篇

乾道剛簡坤體敦密茫茫太素是則是述末世流奔以

文代質悠悠世目孰知其實逝將去此至虛歸我自然之室

孔子不遇時彼感麟

舊作麒麟誤

乎麟胡不遁世以存真

答孫楚詩

晉書隱逸傳曰京在洛陽孫楚時為著作郎數就社中與京語遂載與俱歸京不肯坐楚貽之書曰今亮舜之世胡為懷道迷邦京答之以詩

周道斁兮頌聲沒夏政衰兮五常汨便便君子顧望而逝洋洋乎滿目作者七豈不樂天地之化也哀乎哉時

之不可與對之以獨處無娛我以為歡清流可飲至道

可餐何為栖栖自使疲單魚懸獸檻鄙夫知之古之至

人藏器如雷緼袍不能令暖

當作今暖

軒冕不能令榮動如

川之流靜如川之停鸚鵡能言泗濱浮磬衆人所翫豈

合物情玄鳥紆幕而不被害鳴隼遠巢咸以欲死盼彼

梁魚逡巡倒尾沉吟不決忽焉失水嗟乎魚鳥相與萬

世而不悟以我觀之乃明其故焉知不有達人深穆其

度亦將闚我輦顧而去萬物皆賤惟人為貴動以九州

為狹靜以園堵為大

石崇

字季倫渤海人年二十餘為城陽太守伐吳有功封安陽鄉侯累遷侍中出為南中郎將荊州

刺史領南蠻校尉致富不費後拜太僕衛尉有愛妓綠珠孫秀使人求之不得遂勸趙王倫誅族其家

大雅吟

堂堂太祖淵弘其量仁格宇宙義風遐暢啟土萬里志
在翼亮三分有二周文是尚於穆武王奕世載聰欽明
沖默文思允恭武則不猛化則時雍庭有儀鳳郊有遊

龍啟路千里萬國率從蕩清吳會六合乃同百姓仰德
良史書功超越三代唐虞比蹤

楚妃歎

蕩蕩大楚跨土萬里北據方城南接交趾西撫巴漢東
被海涘五侯九伯是疆是理矯矯莊王淵渟岳峙冕旒
垂精充續塞耳韜光戢曜潛默恭己內委樊姬外任孫
子猗猗樊姬體道履信既紉虞邱九女是進杜絕邪佞
廣啟令脣割歡抑寵居之不吝不吝實難可謂知幾化

自近始著於閨闈光佐霸業邁德揚威羣后列辟式瞻
洪規譬彼江海百川咸歸萬邦作歌身沒名飛

王明君辭

并序

王明君者本是王昭君以觸文帝諱改之匈奴盛請
婚於漢元帝以後宮良家子昭君配焉昔公主嫁烏
孫令琵琶馬上作樂以慰其道路之思其送昭君亦
必爾也其造新曲多哀怨之聲故敘之於紙云爾

我本漢家子將適單于庭辭訣未及終前驅已抗旌僕

御涕流離轅馬悲且鳴哀鬱傷五內泣淚沾朱纓行行
日已遠遂造匈奴城延我於穹廬加我閼氏名殊類非
所安雖貴非所榮父子見陵辱對之慙且驚殺身良不
易默默以苟生苟生亦何聊積思常憤盈願假飛鴻翼
乘之以遐征飛鴻不我顧佇立以屏營昔為匣中玉今
為糞上英朝華不足歡甘與秋草并傳語後世人遠嫁
難為情

思歸引 并序

余少有大志夸邁流俗弱冠登朝歷位二十五年五十以事去官晚節更樂放逸篤好林藪遂肥遁於河陽別業其制宅也却阻長隄前臨清渠栢木幾於萬株江水周於舍下有觀閣池沼多養魚鳥家素習技頗有秦趙之聲出則以遊目弋釣為事入則有琴書之娛又好服食咽氣志在不朽傲然有凌雲之操歛復見牽羈婆娑於九列困於人間煩黷常思歸而永歎尋覽樂篇有思歸引儻古人之心有同於今故制

此曲此曲有弦無歌今為作歌辭以述余懷恨時無
知音者令造新聲而播於絲竹也

思歸引歸河陽假余翼鴻鶴高飛翔經芒阜濟河梁整
我舊館心悅康清渠激魚傍徨鴈驚沂波羣相將終日
周覽樂無方登雲閣列姬姜拊絲竹叩宮商宴華池酌
玉觴

思歸歎

登城隅兮臨長江極望無涯兮思填胸魚澆滑兮烏續

翻澤雉遊鳧兮戲中園秋風厲兮鴻鴈征蟋蟀嘈嘈兮
晨夜鳴落葉飄兮枯枝竦百草零落兮覆畦壟時光逝
今年易盡感彼歲暮兮悵自憇廓羈旅兮滯野都願御
北風兮忽歸徂惟金石兮幽且清林鬱茂兮芳卉一作草

盈玄泉流兮縈丘阜閣館蕭寥兮蔭叢柳吹長笛兮彈

五絃一本作玉琴高歌凌雲兮樂餘年舒篇卷兮與聖談釋

冕投絨兮希彭聃超逍遙兮絕塵埃福亦不至兮禍亦
不來

答曹嘉詩

見魏志註

昔常接羽儀俱遊青雲中
敦道訓胄子儒化渙以融
同聲無異響故使恩愛隆
豈惟敦初好款分在令終
孔不陋九夷老氏適西戎
逍遙滄海隅可以保王躬
世事非所務周公不足夢
玄寂令神王是以守至沖

贈棗腆

久官無成績棲遲於徐方
寂寂守空城悠悠思故鄉
恂恂二三賢身遠屈龍光
攜手沂泗間遂登舞雩堂
文藻

譬春華談話猶蘭芳消憂以觴醴娛耳以名娼博奕逞
妙思弓矢威邊疆

答棗腆

載藝文類聚

言念將別睹物傷情贈爾話言要在遺名惟此遺名可
以長生

曹嘉

魏楚王彪世子封常山真定王入晉封高邑公元康中為國子博士後為東莞太守

贈石崇詩

曹嘉元康中與石崇俱為國子博士後嘉為東莞太守崇為征虜將軍監青徐軍事屯於下邳嘉以

崇 詩遺

文武應時用兼才在明哲嗟嗟我石生為國之俊傑入

侍於皇闈

一作開

出則登九列威檢肅青徐風發宣吳裔

疇昔謬同位情至過魯衛分離踰十載思遠心增結

音髻

願子鑒斯誠寒暑不踰契

曹攄

字顏遠譙國人也篤志好學參南國中郎將遷高密王左司馬流人王適等侵掠城邑遇戰軍

敗死之

思友人詩

密雲翳陽景霖潦淹

五臣作浩

庭除嚴霜彫翠草寒風振纖

枯凜凜天氣清落落卉木踈感時歌蟋蟀思賢詠白駒
情隨玄陰滯心與迴颺俱思心何所懷懷我歐陽子精
義測神奧清機發妙理自我別旬朔微言絕于耳塞裳
不足難清揚未可俟延首出階檐佇立增想似

感舊詩

富貴他人合貧賤親戚離廉蔭門易軌田實相奪移晨
風集茂林棲鳥去枯枝今我唯困蒙羣士所一作皆背馳

鄉人敦懿義濟濟蔭光儀對賓頌有客舉觴詠露斯臨
樂何所歎素絲與路歧

贈石崇

涓涓谷中泉鬱鬱巖下林泄泄羣翟飛咬咬春鳥吟野
次何索寞薄暮愁人心三軍望衡蓋歎息有餘音臨肴
忘肉味對酒不能斟人言重別離斯情效於今

棗腆

字玄方以文章顯永嘉中為襄城太守

答石崇詩

昔我不造備嘗顛沛后土傾基皇天隕蓋少懷蒙昧長
無耿介遺訓莫聞出入靡賴我舅敷命于彼徐方載詠
陟岡言念渭陽乃泝洪流汎身餘艗宵寢晨逝曷路之
長亦既至止願言以寫爰有石侯作鎮東夏寬以撫戎
從容柔雅我聞有言居安思危位極則遷勢至必移上
德無欲貴道不為妙識先覺通夢皇羲竊覩堂與欽蹈
明規

贈石季倫

深蒙君子眷雅顧出羣俗受寶取諸懷所贈非珠玉凡

我二三子執手攜玉腕嘉言從所好企予結雲漢望風

整輕翮因虛舉雙翰朝遊清渠側日夕登高館

初學記載四句

曰翕如翔雲會忽若驚風散分給
懷離析對樂增累歎題云贈石崇

歐陽建

字堅石渤海人石崇甥為馮翊太守趙王倫
之為征西撓亂關中建每匡正不從私欲迎

楚王偉立之由是有隙石崇勸淮南王誅倫
未行事覺倫收崇建及母妻無少長見害

答棗腆詩

此詩文義是贈石季倫藝
文云答棗腆詩或誤也

於鑠我舅明德塞違俾扞東藩在徐之邳載播其惠載

揚其威濟寬以猛方夏以綏光啟先業增耀重暉咨余
沖人艱苦攸離過庭無聞頑固匪移寔賴茲誨導之軌
儀仰遵嘉訓俯蹈明規如葛斯蔓如膠斯垂我邁君子
仰之彌高巖巖其高即之惟溫居盈思沖在貴忘尊縱
酒嘉讌自明及昏無幽不研靡與不論人樂其量士感
其敦

臨終詩

伯陽適西戎孔子欲居蠻苟懷四方志所在可遊盤况

乃遭屯蹇顛沛遇災患古人達機兆策馬遊近關咨余

冲且暗抱責守微官潛圖密已構成此禍福端恢恢六
合間四海一何寬天網布絃網投足不獲安松栢隆冬

悴

五臣
作瘁

然後知歲寒不涉太行險誰知斯路難真偽因

事顯人情難豫觀窮達有定分慷慨復何歎上負慈母

恩痛酷摧心肝下顧所

五臣
作嬌

憐女惻惻心中酸二子棄

若遺念皆邁凶殘不惜一身死惟此如循環執紙五情

塞揮筆涕洟瀾

嵇紹 字延祖，譙國鉅人。康之子，十歲而孤，事母孝謹。累遭散騎常侍惠帝敗於蕩陰，百官左右皆奔。

散唯紹儼然端冕，以身衛帝。兵交，御筆飛箭，雨集，遂以見害。

贈石季倫

人生稟五常，中和為至德。嗜欲雖不同，伐生所不識。仁者安其身，不為外物惑。事故誠多端，未若酒之賊。內以損性命，煩辭傷軌則。屢飲致疲怠，清和自否塞。陽堅敗楚軍，長夜傾宗國。詩書著明戒，量體節飲食。遠希彭聃壽，虛心處沖默。茹芝味醴泉，何為昏酒色。

嵇含

字君道，紹從子也。好學，能屬文。家鞏縣，亳丘自號亳丘子。舉秀才，除郎中。惠帝朝，為中書侍郎。

累官至平越中郎將，廣州刺史。

悅晴

勁風歸巽林，玄雲起重基。朝霞炙瓊樹，夕景映玉枝。

初學

作雲芝
翔鳳晞輕翮，應龍曝纖鬢。百穀偃而立，大木顛復

持

伉儷

余執百兩轡之子，詠采繁我憐。聖善色爾，悅慈姑顏。裁

彼雙絲絹著以同功綿夏搖比翼扇冬卧

藝文作坐

蛩蛩

饑食並根粒渴飲一流泉朝蒸同心

闕

暮庖比日鮮挹

用合醮酌受以連理盤朝采同本芝夕掇駢穗蘭臨軒

樹萱草中庭植合歡

阮脩

字宣子陳留尉氏人好易老善清言瑯邪王處仲引為鴻臚丞太子洗馬避亂南行為賊所害

上巳會詩

三春之季歲惟嘉時靈雨既零

歲時作零雨既濛

風以散之英

華扇耀祥鳥羣嬉澄澄綠水澹澹其波脩岸逶迤長川

相過聊且逍遙其樂如何坐此脩筵臨彼素流嘉肴既
設舉爵獻酬彈箏弄琴新聲上闕水有七德知者所娛
清瀨灑滢菱葭芬敷沉此芳鈞引彼潛魚委餌芳美君

子戒諸

閻丘冲

字賓卿高平人清平有鑒識博學有文義累遷太傅長史光祿勳京邑未潰乘車出為賊

所害時人皆痛惜之

三月三日應詔詩二首

暮春之月春服既成陽昇土潤冰渙川盈餘萌達壤嘉

木敷榮后皇宣遊既宴且寧光光華輦詵詵從臣微風

扇穢朝露翳塵上蔭丹幄下藉文茵臨川

初學作池

挹盥濯

故潔新俯鏡清流仰睇天津藹藹華林巖巖景陽業業
峻宇奕奕飛梁垂蔭倒景若沉若翔

浩浩白水汎汎龍舟皇在靈沼百辟同遊擊擢清歌鼓

柅行酬

初學作謳

聞樂咸和具醉斯柔在昔帝虞德被遐荒

干戚在庭苗民

初學作人

來王今我哲后古聖齊芳惠此中

國以綏四方元首既明股肱惟良樂酒今日君子惟康

初學云樂只君
子今日惟康

招隱詩

大道曠且夷
蹊路安足尋
經世有險易
隱顯自存心
嗟哉巖岫士
歸來從所欽

周處

字子隱義興陽羨人也仕吳為東觀左丞入洛遷新平廣漢二郡太守尋除楚內史徵拜御史

中丞凡所糾劾不避寵戚及氏人齊萬年反朝臣惡其彊使隸夏侯駿西征軍敗死之

詩一首

晉書曰齊萬年屯梁山有眾七萬夏侯駿逼處以五千兵擊之乃攻萬年於六陌處軍未食梁王彤

促令速戰而絕其後繼
處知必敗賦詩云云

去去世事已策馬觀西戎
藜藿甘梁黍期之克令終

時滿

岳奉詔作關中詩曰周殉師令身膏氏斧人之云亡貞節克舉又西戎校尉閻纘亦上詩云周全其節令問不

已身雖云沒

書名良史

郭泰機

以下爵里無考

答傅咸

皦皦白素絲織為寒女衣
寒女雖妙巧不得秉杼機
天寒知運速况復鴈南飛
衣工秉刀尺棄我忽若遺
人不

取諸身世事焉所希况復已朝餐昌由知我饑

辛曠

贈皇甫謐

顯顯朝士亦孔其依莫不遲想載渴載饑我弓我旌禮
亦無違企望高岡來儀來歸其歸伊何與帝同心明明
天子如日之臨臨照四方探賾幽深山無逸民水無潛
鱗爰被一作九臯克量德音茂哉先生皇實是欽

左貴嬪

名芬思之妹少好學善綴文武帝聞而納之
泰始八年拜脩儀後為貴嬪安陋無寵以才

德見禮每有方物異寶必詔
為賦頌以是屢獲恩賜焉

啄木詩

藝文類聚曰宋袁叔俳諧集
左氏詩彤管集作左九嬪

南山有鳥自名啄木
饑則啄樹暮則巢宿
無干於人唯志所欲
性清者榮性濁者辱

感離詩

一作離思此答
左思贈妹之作

自我去膝下倏忽踰再期
邈邈浸彌遠拜奉將何時
披省所賜告尋玩悼離詞
髣髴想容儀欵歔不自持
何時當奉面娛目於書詩
何以訴辛苦告情於文辭

綠珠

石崇妾

懊儂歌

古今樂錄曰懊儂歌晉綠珠所作唯絲布澁難縫一曲而已

絲布澁難縫令儂十指穿黃牛細犢車遊戲出孟津

翔風

怨詩

王子年拾遺記曰石季倫有愛婢曰翔風魏末於胡中得之年十五無有比其容貌最以文辭擅愛年三十妙年者爭嫉之崇退翔風為房老使主羣少乃懷怨而作詩

春華誰不美卒傷秋落時突烟還自低
鄙退豈所期桂芳徒自蠹失愛在蛾眉
坐見芳時歇憔悴空自嗤

古詩紀卷四十

欽定四庫全書

古詩紀卷四十一

明 馮惟訥 撰

晉第十一

劉琨

字越石中山人少以雄豪著名永嘉初為并州刺史建興二年加大將軍都督并州三年進司

空四年其長史以并州叛降石勒琨遂奔薊段匹
碑因與結婚約以共戴晉室元帝渡江復加太尉

封廣武侯後其子羣與匹碑有隙遂被害諡曰愍
。詩品曰太尉劉琨中郎盧湛詩其源出於王粲

善為悽戾之詞自有清拔之氣琨既體良才又罹
厄運故善敘喪亂多感恨之詞中郎仰之傲不逮
矣

答盧諶 八章

琨頓首捐書及詩備辛酸之苦言暢經通之遠旨執
玩反覆不能釋手慨然以悲歡然以喜昔在少壯未
嘗檢括遠慕老莊之齊物近嘉阮生之放曠怪厚薄
何從而生哀樂何由而至自頃輶張困於逆亂國破
家亾親友彫殘塊然獨坐則哀憤兩集負杖行吟則
百憂俱至時復相與舉觴對膝破涕為笑排終身之
積慘求數刻之暫歡譬由疾疢彌年而欲一丸銷之

其可得乎夫才生於世世實須才和氏之璧焉得獨
曜於郢握夜光之珠何得專玩於隨掌天下之寶固
當與天下共之但分析之日不能不悵恨爾然後知
聃周之為虛誕嗣宗之為妄作也昔駮驥倚輶於吳
阪長鳴於良樂知與不知也百里奚愚於虞而智於
秦遇與不遇也今君遇之矣勗之而已不復屬意於
文二十餘年矣久廢則無次想必欲其一反故稱指
送一篇適足以彰來詩之益美耳琨頓首頓首

厄運初邁陽文在六乾象棟傾坤儀舟覆橫厲糾紛羣
妖競逐火燎神州洪流華域彼忝離離彼稷育育哀我
皇晉痛心在目

天地無心萬物同塗禍淫莫驗福善則虛逆有全邑義
無完都英蘂夏落毒卉冬敷如彼龜玉韞櫝毀諸芻狗
之談其最得乎

咨余軟弱弗克負荷愆釁仍彰榮寵屢加威之不建禍
延凶播忠隕于國孝愆於家斯罪之積如彼山河斯釁

之深終莫能磨

郁穆舊姻嫵婉新婚不慮其敗唯義是敦裏糧攜弱甫

匄星奔未輟爾駕已墮

五臣作墮

我門二族偕覆三孽並根

長慙舊孤永負冤蒐

亭亭孤幹獨生無伴綠葉繁縟柔條脩罕朝採爾實夕
捋爾竿竿翠豐尋逸珠盈椀實消我憂憂急用緩逝將
去矣庭虛情滿

虛滿伊何蘭桂移植茂彼春林瘁此秋棘有鳥翻飛不

遑休息匪桐不棲匪竹不食永戢東羽翰撫西翼我之
敬之廢歡輟職

音以賞奏味以殊珍文以明言言以暢神之子之往四
美不臻澄醪覆觴絲竹生塵素卷莫啟幄無談賓既孤
我德又闕我鄰

光光段生出幽遷喬資忠履信武烈文昭旌弓駢駢輿
馬翹翹乃奮長縻是轡是鑣何以贈子竭心公朝何以
敘懷引領長謡

重贈盧諶

握中有玄璧本自荆山璆惟彼太公望昔在渭濱叟鄧
生何感激千里來相求白登幸曲逆

音句遇

鴻門賴留侯

重耳任五賢小白相射鉤苟能隆二伯安問黨與讐中
夜撫枕歎相與數子游吾哀久矣夫何其不夢周誰云
聖達節知命故不憂宣尼悲獲麟西狩涕孔丘功業未
及建夕陽忽西流時哉不我與去乎若雲浮朱實墮勁
風繁英落素秋狹路傾華

一作車

蓋駭駟摧雙軸何意百

鍊剛化為繞指柔

晉書曰琨詩託意非常攄暢幽憤遠想張陳感鴻門白登之善用以激謀

謀素無奇略以常詞訓和殊乖琨心

扶風歌

朝發廣莫門暮宿丹水山左手彎繁弱右手揮龍淵顧
瞻望宮闕俯仰御飛軒據鞍長歎息淚下如流泉繫馬
長松下發鞍高岳頭烈烈悲風起泠泠澗水流揮手長
相謝哽咽不能言浮雲為我結歸五臣作飛鳥為我旋去家
日已遠安知存與亡慷慨窮林中抱膝獨推藏麋鹿遊

我前獲猴戲我側資糧既乏盡薇蕨安可食攬轡命徒

侶吟嘯絕巖中君子道微矣夫子故

一作

有窮惟昔李

騫期寄在匈奴庭忠信反獲罪漢武不見明我欲竟此

曲此曲悲且長棄置勿重陳重陳令心傷

樂府每四句一解凡九解

胡姬年十五

漢辛延年羽林郎曰胡姬年十五春日獨當壚○

樂府作晉劉琨五言律祖作梁劉琨然晉未有律

體律祖或

有考也

虹梁照曉日淥水泛香蓮如何十五少含笑酒壚前花

將面自許人共影相憐回頭堪百萬價重為時年

盧謏

字子諒范陽人好老莊善屬文選尚武帝女榮陽公主後為劉琨主簿轉從事中郎琨為段匹

碑所害謏投段末波後為石季龍所得官至中書監屬冉閔誅石氏因遇害

贈劉琨 二十章

書曰故吏從事中郎盧謏死罪死罪謏稟性短弱當世罕任因其自然用安靜退在木闕不材之資處鴈乏善鳴之分卷異蘧子愚殊甯生匠者時晒不免饑賓嘗自思惟因緣運會得蒙接事自奉清塵於今五

稔謨明之效不著候人之譏已彰大雅含弘量包山
藪加以待接彌優款眷逾昵與運籌之謀厠讌私之
歡綢繆之旨有同骨肉其為知己古人因喻昔聶政
殉嚴遂之顧荆軻慕燕丹之義意氣之間糜軀不悔
雖微達節謂之可庶然苟曰有情孰能不懷故委身
之日夷險以之事與願違當忝外役遂去左右收迹
府朝蓋本同末異楊朱興哀始素終玄墨翟垂涕分
乖之際咸可歎慨致感之途或迫於茲亦奚必臨路

而後長號覩絲而後歔歔哉是以仰惟先情俯覽今
遇感存念亡觸物增眷易曰書不盡言言不盡意然
則書非盡言之器言非盡意之具矣况言有不得至
於盡意書有不得至於盡言邪不勝猥懣謹貢詩一
篇抑不足以揄揚弘美亦以攄其所抱而已若公肆
大惠遂其厚恩錫以咳唾之音慰其違離之意則所
謂咸池酬於北里夜光報於魚目謚之願也非所敢
望也謚死罪死罪

濬哲惟皇紹熙有晉振厥弛維光闡遠韻有來斯雍至
止伊順三台擣朗四嶽增峻

伊陟佐商山甫翼周弘濟艱難對揚王休苟非異德曠
世同流加其忠貞宣其徽猷

伊謚陋宗昔邁嘉惠申以婚姻著以累世義等休戚好
同興廢孰云匪諧如樂之契

王室喪師私門播遷望公歸之視險忽艱茲願不遂中
路阻顛仰悲先意俯思身愆

大鈞載運良辰遂往瞻彼日月迅過俯仰感今惟昔口
存心想借曰如昨忽為疇曩

疇曩伊何逝者彌踈温温恭人慎終如初覽彼遺音恤
此窮孤譬彼樛木蔓葛以敷

妙哉蔓葛得託樛木葉不雲布華不星燭承侔卞和質

非荆璞眷同尤良

尤郵同

用乏驥騮

承亦既篤眷亦既親飾獎駕猥方駕駿珍弼諧靡成良
謨莫陳無覲狐趙有與五臣

五臣奚與契濶百罹

五臣作羅

身經險阻足蹈幽遐義由恩

深分隨昵如綢繆委心自同匪他

昔在暇日妙尋通理尤彼意氣狹是節士情以體生感

以情起趣舍同

李善作罔

要窮達斯已

由余片言秦人是憚日殫效忠飛聲有漢桓桓撫軍古
賢作冠來牧幽都濟厥塗炭

塗炭既濟寇挫民阜謬其疲隸授之朝右上懼任大下
欣施厚實祗高明敢忘所守

相彼反哺尚在翔禽孰是人斯而忍斯心每憑山海庶
覲高深遐眺存亡緬成飛沉

長徽已纓逝將徒舉收跡西踐銜哀東顧曷云塗遼曾
不咫尺豈不夙夜謂行多露

綿綿女蘿施于松標稟澤洪幹晞陽豐條根淺難固莖
弱易彫操彼纖質承此銜颺

纖質寔微銜颺斯值誰謂言精緻其賞意不見得魚亦
忘厥餌遺其形骸寄之深識

先民頤意潛山隱
几仰熙丹崖俯深綠
水無求於和自
附衆美慷慨遐蹤
有愧高旨

爰造異論肝膽楚越
惟同大觀萬塗一轍
死生既齊榮辱奚別
處其玄根廓焉靡結

福為禍始禍作福階
天地盈虛寒暑周迴
夫差不祀豐在勝齊
句踐作伯祚自會稽

邈矣達度唯道是杖
形有未泰神無不暢
如川之流如淵之量
上弘棟隆下塞民望

贈崔溫

集曰與溫大
真崔道儒

逍遙步城隅
暇日聊游豫
北眺沙漠垂
南望舊京路
平陸引長流
岡巒挺茂樹
中原厲迅飈
山河起雲霧
遊子恒悲懷
舉目增永慕
良儔不獲偕
舒情將馬訴
遠念賢士風
遂存往古務
朔鄙多俠氣
豈唯地所固
李牧鎮邊城
荒夷懷南懼
趙奢正疆場
秦人折北慮
羈旅及寬政
委質與時遇
恨以鴛蹇安
徒煩非子御
亦既弛負擔
忝位宰黔庶
苟云免罪戾
何暇收民譽
倪寬以殿黜
終乃

最衆賦何武不赫赫遺愛常在去古人非所希短弱自
有素何以敷斯辭惟以二子故

答魏子悌

崇臺非一榦珍裘非一腋多士成大業羣賢濟弘績遇
蒙時來會聊齊朝彥跡顧此腹背羽愧彼排虛翮寄身
蔭四嶽託好憑三益傾蓋雖終朝大分邁疇昔在危每
同險處安不異易俱涉晉昌艱共更飛狐厄思由契濶
生義隨周旋積豈謂鄉曲譽謬充本州役乖離令我感

悲欣使情惕理以精神通匪曰形骸隔妙詩申篤好清
義賁幽曠恨無隨侯珠以酬荆文璧

覽古詩

趙氏有和璧天下無不傳秦人來求市厥價徒空言與
之將見賣不與恐致患簡才選作備行李圖令國命全

蘭生在下位繆子稱其賢奉辭馳出境伏軾徑入關秦
王御殿坐趙使擁節前揮袂睨金柱身玉要俱捐連城
既偽徃荆玉亦真還爰在澠池會二主克交歡昭襄欲

負力相如折其端
背血下霑襟
怒髮上衝冠
西岳終雙擊
東瑟不隻彈
捨生豈不易
處死誠獨難
稜威章臺顛
彊禦亦不干
屈節邯鄲中
俛首忍回軒
廉公何為者
負荆謝厥讐
智勇冠當世
弛張使我歎

時興詩

疊疊圓象運悠悠
方儀廓忽忽歲云暮
將原采蕭藿
北踰邙與河南臨
伊與洛凝霜霑
蔓草悲風振
林薄撼撼芳葉零
樂樂芬華落下泉
激冽清曠野
增遼索登高眺

遐荒極望無崖岸形變隨時化神感因物作澹乎至人
心恬然存玄漠

重贈劉琨

璧由識者顯龍因慶雲翔茨棘非所憇翰飛遊高岡余
音非九韶何以儀鳳凰新城非芝圃昌由殖蘭芳

闕

答劉琨

隨寶產漢濱槁此夜光真不待卞和顯自為命世珍

闕

失題

遊舉遊名山松喬共相追層崖成崇館巖阿結重關

郭璞

字景純河東聞喜人文章冠一時尤妙於陰陽算歷卜筮之術王導引為參軍補著作佐郎遷

尚書郎以母憂去王敦起為記室參軍敦既謀逆使筮璞曰無成壽且不久敦大怒即收斬之及敦平追贈弘農太守○詩品曰郭璞詩憲章潘岳文體相輝彪炳可玩始變永嘉平淡之體故稱中興第一翰林以為詩首但遊仙之作辭多慷慨乖遠玄宗而云奈何虎豹姿又云戢翼棲榛梗乃是坎壈詠懷非列仙之趣也

贈溫嶠

人亦有言松竹有林及爾臭味異苔同岑言以忘得交

以淡成同匪伊和惟我與生爾神余契我懷子情攜手
一豁安知塵冥

遊仙詩十四首

京華游俠窟

五臣
作客

山林隱遯棲朱門何足榮未若託蓬

萊臨源挹清波陵岡掇丹萸靈谿可潛盤安事登雲梯
漆園有傲吏萊氏有逸妻進則保龍見退為觸藩羝高
蹈風塵外長揖謝夷齊

青溪千餘仞中有一道士雲生梁棟間風出窻戶裏借

問此何誰云是鬼谷子翹迹企潁陽臨河思洗耳闔闔
西南來潛波渙鱗起靈妃顧我笑粲然啟玉齒蹇修時
不存要之將誰使

翡翠戲蘭若容色更相鮮綠蘿結高林蒙籠葢一山中
有冥寂士靜嘯撫清絃放情凌霄外嚼藥挹飛泉赤松
臨上游駕鴻乘紫煙左挹浮丘袖右拍洪崖肩借問蜉
蝣輩寧知龜鶴年

六龍安可頓運流有代謝時變感人思已秋復願夏淮

海變微禽吾生獨不化雖欲騰丹谿雲螭非我駕愧無
魯陽德迴日向三舍臨川哀年邁撫心獨悲吒

逸翮思拂霄迅足羨遠游清源無增瀾安得運吞舟珪
璋雖特達明月難闇投潛穎怨青陽陵茗哀素秋悲來
惻丹心零淚緣纓流

雜縣

音爰

寓魯門風暖將為災吞舟涌海底高浪駕蓬萊

神仙排雲出但見金銀臺陵陽挹丹溜容成揮玉杯姮
娥揚妙音洪崖領其頤升降隨長煙飄颻戲九垓竒齡

邁五龍千歲方嬰孩燕昭無靈氣漢武非仙才

晦朔如循環月盈已復魄蓐收清西陸朱羲將由白寒
露拂陵茗女蘿辭松柏薜榮不終朝蜉蝣豈見夕圓丘
有奇草鍾山出靈液王孫列八珍安期鍊五石長揖當
途人去來山林客

暘谷吐靈曜扶桑森千

一作萬

丈朱霞升東山朝日何晃

朗迴風流曲櫺幽室發逸響悠然心永懷眇爾自遐想
仰思舉雲翼延首矯玉掌嘯傲遺世羅縱情在

一作任獨

往明道雖若昧其中有妙象希賢宜勵德羨魚當結網
採藥遊名山將以救年頽呼吸玉滋液妙氣盈胸懷登
仙撫龍馭迅駕乘奔雷鱗初學作鱗裳逐電曜雲蓋隨風迴
手頓羲和轡足蹈閭闔開東海猶蹄泠崑崙崙一作蟻
堆遐邈冥茫中俯視令人哀

璇臺冠崑嶺西海濱招搖瓊林籠藻映碧樹疏英翹丹
泉漂朱沫黑水鼓玄濤尋仙萬餘日今乃見子喬振髮
晞翠霞解褐被絳綃總轡臨少廣盤虬舞雲輶永偕帝

鄉侶千齡共逍遙

登嶽採五芝涉澗將六草散髮蕩玄溜終年不華皓
四瀆流如淚五嶽羅若垤尋我青雲友永與時人絕
靜歎亦何念悲此妙齡逝在世無千月命如秋葉蒂蘭
生蓬芭間榮曜常幽翳

縱酒濛汜濱結駕尋木末翹手攀金梯飛步登玉闕左
顧擁方目右眷極朱髮

贈潘尼

杞梓生南荆竒才應世出擢穎蓋漢陽鴻聲駭皇室遂
應四科運朱衣耀玉質

失題

見藝文春部
以下闕文

青陽暢和氣谷風穆以溫英蔭曄林蒼昆蟲咸啟門高
臺臨迅流四坐列王孫羽蓋停雲陰翠鬱映玉樽

同前

見藝文類
聚夏部

羲和騁丹衢朱明赫其猛融風拂晨霄陽精一何罔閒
宇靜無娛端坐愁日永

同前

見初學
記別部

君如秋日雲妾似突中煙高下理自殊一乖雨絕天

古詩紀卷四十一

欽定四庫全書

古詩紀卷四十二

明 馮惟訥 撰

晉第十二

楊方

字公回少好學有異才司徒王導辟為掾轉東安太守遷司徒參軍事補高梁太守後以年老

棄郡歸
終於家

合歡詩二首

虎嘯谷風起龍躍景雲浮同聲好相應同氣自相求我
情與子親譬如影追軀食共並一作同根穗飲共連理杯

衣共雙絲絹寢共無縫綢居願接膝坐行願攜手趨子

靜我不動子遊我不留齊彼同心鳥譬此一作比目魚

情至斷金石膠漆未為牢但願常無別合形作一軀生
為併身物死為同棺灰秦氏自言至我情不可儔

磁石引長針陽燧下炎煙宮商聲相和心同自相親我
情與子合亦如影追身寢共織成被絮共同功綿暑搖
比翼扇寒坐併肩氍毹子笑我心哂子感我無歡來與子
共迹去與子同塵齊彼蛩蛩獸舉動不相捐唯願長無

別合形作一身生有同室好死成併棺民徐氏自言至
我情不可陳

襟詩三首

樂府通前作合
歡詩今從玉臺

獨坐空室中愁有數千端悲響答愁歎哀涕應苦言

玉臺

作彷徨四顧望白日入西山不覩佳人來但見飛鳥還
飛鳥亦何樂夕宿自作羣

飛黃銜長轡翼翼回輕輪俯涉淥水澗仰過九層山脩
途曲且險秋草生兩邊黃華如沓金白花如散銀青敷

羅翠采絳葩象赤雲爰有承露枝紫榮合素芬扶疎重
清藻布翹芳且鮮目為豔采回心為奇色旋撫心悼孤
客俯仰還自憐踟躕向壁歎攬筆作此文

南鄰

玉臺
作林

有奇樹承春挺素華豐翹被長條綠葉蔽朱

柯因風吐微音芳氣入紫霞我心羨此木願徙著予家
夕得遊其下朝得弄其葩爾根深且堅

藝文類
聚作因

予宅淺

且洿移植良無期歎息將如何

葛洪

字稚川丹陽句容人少以儒學知名尤好神仙
導養之法元帝辟為掾以平賊功賜爵關內侯

後求為句漏令以
就丹砂帝從之

洗藥池

在贛州興國縣洪過境見山靈水秀遂
結廬築壇鑿池洗藥留四言詩一首

洞陰泠泠風珮清清仙居永劫花木長榮

王鑿

字茂高堂邑人父潛御史中丞少以文筆著稱
初為元帝琅邪國侍郎時杜弢作逆王敦不能
制鑿勸帝征之會弢已平拜駙
馬都尉奉朝請出補永興令

七夕觀織女

牽牛悲殊館織女悼

一作怨

離家一稔期一宵此期良可

且一作嘉赫奕玄門開飛閣鬱嵯峨隱隱驅千乘闐闐越

星河六龍奮瑤轡文螭負瓊車火丹東瑰燭素女執瓊

華絳旗若吐電朱

一作彩

蓋如振霞雲韶何嘈噉靈鼓鳴

相和停軒佇

一作紆

高盼眷予在岌峩澤因芳露沾恩附

蘭風加明發相從遊翩翩鸞鷲羅同遊不同觀念子憂

怨多敬因三祝末以爾屬皇娥

熊甫

別歌

晉書曰錢鳳為王敦鎧曹參軍知敦有不臣之心
相與朋構專弄威權參軍熊甫諫敦不聽遂告歸

臨別
歌曰

徂風颺起蓋山陵
氛霧蔽日玉石焚
往事既去可長歎
念別惆悵復會難

梅陶

明帝時
為尚書

怨詩行

庭植不材柳苑育能鳴
鶴鼓枝遊畦畝棲釣一丘壑
晨
悅朝敷榮夕乘南音
客晝立薄遊景暮宿漢陰
魄庇身

蔭王猷罷塞反幻迹

桓温

字元子，譙國龍亢人。少有豪邁風氣，累遷琅邪內史，進征西大將軍、大司馬、卒諡宣武侯。

八陣圖

望古識其真，臨源愛往跡。恐君遺事節，聊下南山石。

王彪之

字叔虎，初除著作郎，累遷吏部尚書，後為鎮軍將軍，會稽內史，孝武即位，遷尚書令，卒。

登會稽刻石山

隆山嵯峨，崇巖崑嶸，傍覲滄洲，仰拂玄霄。文命遠會，風淳道遼。秦皇遐巡，邁茲英豪。宅靈基阿，銘跡峻嶠。青陽

曜景時和氣淳修嶺增鮮長松挺新飛鴻振羽騰龍躍
鱗

與諸兄弟方山別詩

脂車總馳輪汎舟理飛棹絲染墨悲歎路岐楊感悼
關

謝尚

字仁祖陳郡人累遷尚書僕射出督江淮歷陽揚豫諸軍事進號鎮西將軍桓溫請為司州都

督以疾不行
卒於歷陽

大道曲

樂府廣題曰謝尚為鎮西將軍嘗著紫羅襦據胡牀在市中佛國門樓上彈琵琶作大道曲市人不

知是三
公也

青陽二三月柳青桃復紅車馬不相識音落黃埃中

孫綽

字興公統之弟博學善屬文為著作佐郎累遷散騎常侍轉廷尉卿領著作卒

表哀詩 并序

天地之德曰生生之所恃者親親存則歡泰情盡親
亡則哀悴理極故老萊婆娑於膝下曾閔泣血於終
年哀悼之思至矣自然之性篤矣余以薄祐夙遭閔
凶越在九齡嚴考即世未及志學過庭無聞天覆既

淪俯憑坤厚殖根外氏賴以成訓然以不才不能負
荷仁妣弘母儀之德邁榮寒之操雕琢固頑勉以道
義庶幾砥礪犬馬之報豈悟一朝復見孤棄上天極
禍怨痛莫訴皆由惡積咎深不能通感自丁荼毒載
離寒暑茵帷塵寂棟宇寥恍仰悲軌迹長自矜悼不
勝哀號作詩一首敢冒諒闇之譏以申罔極之痛詩

曰

茫茫太極賦受理殊咨生不辰仁考宿

一作風

徂微微沖

弱眇眇偏孤叩心昊蒼痛貫黃墟肅我以義鞠我以仁
嚴邁商風恩洽陽春昔聞鄒母勤教善分懿矣慈妣曠
世齊運嗟予小子譬彼土奠俯愧陋質仰忝高訓悠悠
玄運四氣錯序自我酷痛載離寒暑寥寥空堂寂寂響
戶塵蒙几筵風生棟宇感昔有恃望晨遲顏婉孌懷袖
極願盡歡奈何慈妣歸體幽埏酷矣痛深剖髓摧肝

三月三日

姑洗翰運首陽穆闢嘉卉萋萋溫風暖暖言滌長瀨聊

以游衍縹蒨流綠柳蔭坂羽從風飄鱗隨浪轉

秋日

蕭瑟仲秋日飈唳風雲高山居感時變遠客興長謠疎
林積涼風虛岫結凝霄湛露灑庭林密葉辭榮條撫菌

藝文
作葉

悲先落鬱

一作
攀

松羨後凋垂綸在林野交情遠市

朝澹然古懷心濠上豈伊遥

情人碧玉歌二首

碧玉歌一名千金意晉孫綽所
作樂府詩集云宋汝南王作

碧玉小家女不敢攀貴德感郎千金意慙無傾城色

碧玉破瓜時郎為情顛倒感君不羞赧迴身就郎抱

王獻之

字子敬羲之子少有盛名而高邁不羈風流為一時之冠起家州主簿秘書丞選尚新安

公主尋除建威將軍吳興太守徵拜中書令卒於官

桃葉歌二首

古今樂錄曰桃葉歌者晉王子敬之所作也桃葉子敬妾名緣於篤愛所以歌之

桃葉復桃葉渡江不用楫但渡無所苦我自來迎接

藝文

作我自
接迎汝

桃葉復桃葉桃葉連桃根相憐兩樂事獨使我殷勤

藝文

綿作纏

江道

字道載陳留圉人避亂臨海為蔡謨何充所引用以家貧求為太末令遷吳令殷浩謀北伐請

為諮議參軍升平中累遷太常卒

詠秋

祝融解炎轡葺收起涼駕高風催節變凝露督物化長
林悲素秋茂草思朱夏鳴鴈薄雲嶺蟋蟀吟深榭寒蟬
向一作竟夕號驚颺激中夜感物增人懷悽然無欣暇

詠貧

華門不啟扉環堵蒙

初學作滿

蒿榛空瓢覆壁下簞上自生

塵出門誰氏子憊哉一何貧

庾闡

字仲初潁川人性好學九歲能屬文初為西陽王掾累遷尚書郎蘇峻之難出奔郗鑿為之叅

軍峻平召為散騎侍郎補

零陵太守徵拜給事中

孫登隱居詩

靈巖霞蔚石室鱗構青松標空蘭泉吐牖龍蒼可遊芳
津可漱玄谷蕭寥鳴琴獨奏先生體之寂坐幽岸凝冰

結樸熙陽靡煥潛真內全飛榮外散凌崖高嘯希風朗
彈道有冥廢運有昏消達隱不巖玄跡不標或曰先生
晦德逍遙稽子秀達英風朗烈道雋薰芳鮮不玉折兆
動初萌妙鑒奇絕翹首丘冥仰想玄哲

三月三日臨曲水

暮春濯清汜遊鱗泳一壑高泉吐東岑洄瀾自淨樂臨
川疊曲流豐林映綠薄輕舟沉飛觴鼓柁觀魚躍

三月三日

心結湘川渚目散沖霄外
清泉吐翠流淥醑漂素瀨
悠想盼長川輕瀾渺如帶

觀石鼓

石鼓
山名

命駕觀竒逸徑驚造靈山
朝濟清溪岸夕憇五龍泉
鳴石含潛響雷駭震九天
妙化非不有莫知神自然
翔霄拂翠嶺綠澗漱巖間
手澡春泉潔目翫陽葩鮮

登楚山

拂駕升西嶺寓目臨浚波
想望七德耀詠此九功歌
龍

駟釋陽林朝服集三河回首盼宇宙一無濟邦家

衡山

北眺衡山首南睨

初學作瞻

五嶺末寂坐挹虛恬運目情四

豁翔虬凌九霄陸鱗困濡沫未

藝文作既

體江湖悠安識南

溟濶

江都遇風

天吳踊靈壑將駕奔冥霄飛廉振折木流

一作靈

景登扶

搖洪川佇宿浪躍水迎晨潮仰盼感玄雲俯聽聒悲颺

採藥詩

採藥靈山嶮結駕登九嶷懸巖溜石髓芳谷挺丹芝冷
泠雲珠落漼漼石室滋鮮景染冰顏妙氣翼翼冥期霞光
煥藿靡虹景照參差椿壽自有極槿花何用疑

遊仙詩四首

邛疏鍊石髓赤松漱水玉憑煙眇封子流浪揮玄俗崆
峒臨北戶昆吾眇南陸層霄映紫芝潛澗汎丹菊崑崙
涌五河八流縈地軸

三山羅如粟巨壑不容刀
白龍騰子明朱鱗運琴高
輕舉觀滄海眇邈去瀛洲
玉泉出靈鳧瓊草被神丘

神嶽竦丹霄玉堂臨雪嶺
上採瓊樹華下挹瑤泉井

闕

南海納朱濤玄波灑北溟
仰盼燭龍曜俯步朝廣庭

闕

同前六首

熒熒丹桂紫芝結根雲山
九疑鮮榮夏馥冬熙誰與薄
采松期

赤松遊霞乘煙封子鍊骨
凌仙晨漱水玉心玄故能靈

化自然

乘彼六氣渺茫輜駕赤水崑陽遙望至人玄堂心與罔
象俱忘

朝餐雲英玉藥夕挹玉膏石髓瑶臺藻構霞綺鱗裳羽
蓋級纒

玉樹標雲翠蔚靈崖獨拔奇卉芳津蘭瑩珠隧碧葉灌
清鱗萃

玉房石楡磊砢燭龍銜輝吐火朝採石英澗左夕醫瓊

葩巖下

李充

字宏度江夏人辟丞相王導掾除剡縣令後為大著作郎累遷中書侍郎卒

嘲友人

同好齊歡愛纏綿一何深
子既識我情我亦知子心
燕婉歷年歲和樂如瑟琴
良辰不我俱中闊似商參
爾隔北山陽我分南川陰
嘉會罔克從積思安可任
目想妍麗姿耳存清媚音
脩晝興永念遙夜獨悲吟
逝將尋行役言別泣沾巾
願爾降玉趾一顧重千金

七月七日

朗月垂玄景，洪漢截皓蒼。
牽牛難牽牛。

一作

織女守空

箱

一作

河廣尚可越，怨此漢無梁。

送許從詩

來若迅風歡逝如歸雲，
征離合理之常聚，散安足驚

李顥

充之子，有文義多，所述作郡舉孝廉。

經渦路作

言歸越東足逝將反，上都後洹填中路，
改轍脩茲衢，旦

發石亭境夕宿桑首墟勁焱不興潤零雨莫能濡亢陽
彌十旬涓滴未暫舒泉流成平陸結駟可迴車肇允相
忘鱗翻為涸池魚咫尺步不能移白日奄桑榆

涉湖

旋經義興境弭

初學記
作頓

棹石蘭渚震澤為何在今唯太

湖浦圓徑縈五百眇目緬無覩高天森若岸長津襟如
縷窈窕尋灣漪迢遞望巒嶼驚飈揚飛湍浮霄薄懸岨
輕禽翔雲漢游鱗憇中澗黯藹天時陰岩堯舟航舞憑

河安可殉靜觀戒征旅

夏日

炎光爍

藝文作爍

南溟溽暑融三夏靈霽重雲陰砮稜震靄

吒關

感冬篇

高陽攬玄轡太皞御冬始望舒游天策曜靈協燕紀

關

袁宏

字彦伯陳郡人有逸才文章絕美謝尚引為參軍累遷大司馬桓溫府記室後自吏部郎出為

東陽太守卒○詩品曰彦伯詠史雖文體未適而鮮明緊健去凡俗遠矣

從征行方頭山

峩峩太行凌虛抗勢天嶺交氣窈然無際澄流入神女
谷應契四象悟心幽人來憇

詠史二首

世說曰袁虎少貧嘗為人傭載運租謝鎮西經船行其夜清風朗月聞估客船上有詠詩聲甚有情致即遣訊問乃是袁自詠其所作詠史詩因此相要大相賞得虎表宏小字也

周昌梗槩臣辭達不為訥汲黯社稷器棟梁天表骨陸
賈厭解紛時與酒檮杌婉轉將相門一言和平勃趨舍

各有之俱令道不沒

無名困螻蟻有名世所疑中庸難為體狂狷不及時楊
惲非忌貴知及有餘辭躬耕南山下蕪穢不遑治趙瑟
奏哀音秦聲歌新詩吐音非凡唱負此欲何之

擬古

高館百餘仞迢遞虛中亭文幌曜瓊扇碧疏映綺櫺

闕

失題

見藝文
松部

森森千丈松磊砢非一節雖無榱桷麗較為梁棟桀

闕

曹毗字輔佐，譙國人。少好文籍，善屬詞賦。郡察孝廉，除郎中。蔡謨舉為佐著作郎，累遷至光祿勳。

詠史

軒轅應玄期，幼能總百神。
體鍊五靈妙，氣含雲露津。
慘石曾城岫，鑄鼎荆山濱。
豁焉天扉開，飄然跨騰鱗。
儀轡灑長風，褰裳躡紫宸。

詠冬

繇邈冬夕

初學記
作宵

永凜厲寒氣，升離葉向晨。
落長風振

條興夜靜，輕響起天清。
月暉澄寒冰，盈渠結素霜。
竟櫂

凝今載忽已暮來紀

初學作正

奄復仍

夜聽擣衣

寒興御紈素佳人理衣衾

一作治衣襟

冬夜清且永皓月照

堂陰纖手疊輕素朗杵叩鳴砧清風流繁節迴颺灑微吟嗟此嘉運速悼彼幽滯心二物感余懷豈但聲與音

正朝

靈春散初澤焚煜青陽舒佳袍忽已故今載奄復初軟

節暢宇宙和風被八區

闕

霖雨

洪霖彌旬日翳翳四區昏紫電光飛牖迅雷終天奔

關

許詢

字玄度高陽人總角秀惠衆稱神童長而風情簡素司徒掾辟不就蚤卒○簡文稱許掾云玄

度五言詩可謂妙絕時人

竹扇

良工眇芳林妙思觸物騁篋疑秋蟬翼團取望舒景

習鑿齒

字彥威襄陽人博學洽聞以文章著稱桓溫辟為從事累遷別駕遷衛陽太守以疾歸

燈

一作詠籠燈

煌煌閒夜燈修修樹間亮燈隨風焯煜風與燈升降

袁山松

陳郡陽夏人喬之孫也少有才名博學有文章歷吳郡太守孫恩作亂山松守滬瀆城城

陷被

荊

靈荊植幽崖擢穎陵寒飈春露不染色秋霜不改條

顧愷之

字長康晉陵無錫人博學有才氣桓溫引為大司馬參軍後為殷仲堪參軍

神情詩

亦見
陶集

春水滿四澤夏雲多奇峯秋月揚明輝冬嶺秀孤松
摘句


劉恢字道生沛國人識局明濟有文武才
為車騎司馬年三十六卒贈前將軍

失題

見藝文
馬部

東臯有一駿名曰千金駒絡首纏駿尾養以甘露芻

關



古詩紀卷四十二

欽定四庫全書

集部

古詩紀卷四十五

詳校官檢討臣德生

侍讀臣孫球覆勘

總校官知縣臣楊懋珩

校對官助教臣卜維吉

謄錄監生臣魏繩曾

欽定四庫全書

古詩紀卷四十三

明 馮惟訥 撰

晉第十三

蘭亭集詩 并序

右將軍王羲之 二首

字逸少 琅琊臨沂人 善草隸 累遷江州刺史 右軍將

軍會稽

內史

永和九年歲在癸丑暮春之初會于會稽山陰之蘭亭修禊事也羣賢畢至少長咸集此地有崇山峻嶺

茂林修竹又有清流激湍映帶左右引以為流觴曲水列坐其次雖無絲竹管弦之盛一觴一詠亦足以暢敘幽情是日也天朗氣清惠風和暢仰觀宇宙之大俯察品類之盛所以遊目騁懷足以極視聽之娛信可樂也夫人之相與俯仰一世或取諸懷抱晤言一室之內或因寄所託放浪形骸之外雖趨舍萬殊靜躁不同當其欣於所遇暫得於己快然自足不知老之將至及其所之既倦情隨事遷感慨係之矣向

之所欣俛仰之間已為陳迹猶不能不以之興懷况
修短隨化終期於盡古人云死生亦大矣豈不痛哉
每覽昔人興感之由若合一契未嘗不臨文嗟悼不
能喻之於懷固知一死生為虛誕齊彭殤為妄作後
之視今亦由今之視昔悲夫故列敘時人錄其所述
雖世殊事異所以興懷其致一也後之覽者亦將有
感於斯文

代謝鱗次忽焉以周欣此暮春和氣載柔詠彼舞雩異

世同流迺攜齊契散懷一丘

仰視碧天際俯瞰淥水濱
寥閒無涯觀寓目理自陳
大矣造化工萬殊莫不均
羣籟雖參差適我無非親

琅邪王友謝安二首

字安石尚之弟官太保都督封廬陵郡公

伊昔先子有懷春遊契茲言執寄傲林丘
森森連領茫
茫原疇迴霄垂霧凝泉散流

相與欣佳節率爾同褰裳薄雲羅景物微風翼輕航
醇醪陶丹府兀若遊羲唐萬殊混一理安復覺彭殤

司徒左西屬謝萬二首

字萬石太傅安弟也才氣高俊蚤知名歷吏部

西中郎將豫州刺史散騎常侍

肆眺崇阿寓目高林青蘿翳岫修竹冠岑谷流清響條
鼓鳴音玄嶠吐潤霏霧成陰

司冥卷陰旗句芒舒陽旌靈液被九區光風扇鮮榮碧
林輝翠萼紅葩擢新莖翔禽撫翰游騰鱗躍清泠

前餘杭令孫統二首

字承公太原中都人楚之孫

茫茫大造萬化齊軌罔悟云

一作玄

同競異標旨平勃運

謀黃綺隱凡我仰希期山期水

地主觀山水仰尋幽人踪回沼激中逵疎竹間修桐因
流轉輕觴冷風颺落松時禽吟長澗萬籟吹連峯

左司馬孫綽二首

春詠登臺亦有臨流懷彼伐木宿

一作肅

此良儔修竹蔭

沼旋瀨縈丘穿池激湍連濫觴舟

流風拂枉渚停雲蔭九臯鶯語吟修竹游鱗戲瀾濤攜
筆落雲藻微言剖纖毫時珍豈不甘忘味在聞韶

中軍參軍孫嗣

綽之子

望巖懷逸許臨流想奇莊誰云真風絕千載挹餘

遺一作

芳

散騎常侍郗曇

字重熙高平金鄉人官至徐兗二州刺史

溫風起東谷和氣振柔條端坐興遠想薄言遊近郊

潁川庾友

字惠彥小字玉臺潁川鄆陵人歷中書郎東陽太守

馳心域表寥寥遠邁理感則一冥然斯會

潁川庾蘊

仰想虛舟說俯歎世上賓朝榮雖云樂夕斃理自因

行參軍曹茂之

字永世彭城人仕至尚書郎

時來誰不懷寄散山林間尚想方外賓迢迢有餘閒

上虞令華茂

廣陵人元帝時嗣父爵封都亭侯

林榮其鬱浪激其隈汎汎輕觴載欣載懷

滎陽桓偉

按晉書桓偉譙國龍亢人玄之兄玄為荊州以偉為冠軍將軍後加安西

將軍荊州刺史此云滎陽未知是否

主人雖無懷應物貴有尚宣尼遨沂津蕭然心神王數

子各言志曾生發清唱今我欣斯遊愠情亦暫暢

陳郡袁嶠之二首

晉書袁嶠字彥叔陳郡陽夏人桓溫引為廣陵相遷江夏

相勸溫伐蜀進號龍驤將軍未知是否

人亦有言得意則歡佳賓既臻相與遊盤微一作音迭

詠馥焉若蘭苟齊一致遐想揭竿

四眺華林茂俯仰晴

一作清

川渙激水流芳醪豁爾累心

散遐想逸民軌遺音良可玩古人詠舞雩今也同斯歎

王玄之

羲之長子早卒

松竹挺巖崖幽澗激清流消散肆情志酣暢豁滯憂

王凝之二首

字叔平義之第二子也歷江州刺史左將軍會稽內史孫恩攻會稽

為恩所害

莊浪濠津巢步潁渚冥心真寄千載同歸

氤氳柔風扇熙怡和氣淳駕言興時遊逍遙暎通津

王肅之二首

字幼恭義之第四子歷中書郎驃騎諮議

在昔暇日味存林嶺今我斯遊神怡心靜

嘉會欣時游豁爾暢心神吟詠曲水瀨淥波轉素鱗

王徽之二首

字子猷義之第五子卓犖不羈欲為傲達仕至黃門侍郎

散懷山水蕭然忘羈秀薄粲穎疎松籠崖遊羽扇霄鱗
躍清池歸目寄歡心冥二奇

先師有冥藏安用羈世羅未若保沖真齊契箕山阿

王渙之

去來悠悠子披褐良足欽超跡修獨往真契齊古今

王彬之二首

丹崖竦立葩藻映林渌水揚波載浮載沉

鮮葩映林薄游鱗戲清渠臨川欣投釣得意豈在魚

王蘊之

散豁情志暢塵纓忽已捐仰詠挹餘一作遺芳怡情味重

淵

行參軍王豐之

肆盼巖岫臨泉濯趾感興魚鳥安居幽跼

郡功曹魏滂

三春陶和氣萬物齊一歡明后欣時豐駕言暎清瀾壘

疊德音暢蕭蕭遺世難望巖愧脫屣臨川謝揭竿

鎮軍司馬虞說

神散宇宙內形浪濠梁津寄暢須臾歡尚想味古人

郡五官謝繹

縱暢任所適回波縈游鱗千載同一朝沐浴陶清塵

行參軍徐豐之二首

俯揮素波仰掇芳蘭尚想嘉客希風永歎

清響擬絲竹班荆對綺䟽零觴飛曲津歡然朱顏舒

徐州西平曹華

願與達人游解結遨濠梁狂吟任所適浪流無何鄉

後序

孫綽

古人以水喻性有旨哉非所以澄之則清清之則濁
耶故振轡於朝市則充拙之心生閒步於林野則寥
落之意興仰瞻羲唐邈然遠矣近詠臺閣顧探增懷
聊於曖昧之中期乎瑩拂之道暮春之始禊于南澗
之濱高嶺千尋長湖萬頃乃藉芳草鑑清流覽卉物

觀魚鳥具類同榮資生咸暢於是和以醇醪齊以達
觀快然兀矣焉復覺鵬鷃之二物哉耀靈縱轡急景
西邁樂與時去悲亦系之徃復推移新故相換今日
之迹明復陳矣原詩人之致興諒歌詠之有由文多
不載大畧如此所賦詩亦裁而綴之如前四言五言
焉

古詩紀卷四十三